




cept





LE
MANIFESTE
DE LA FRANCE,
AVX PARISIENS
& à tout le peuple
François.

Felix Hon.

M. D. XC.

+

M A N I F E S T
OF LA W

Case

7

39

.320

THE NEWBERRY
LIBRARY

1590ma

M. D. C.

LE MANIFESTE

DE LA FRANCE,

*aux Parisiens & à tout le
peuple François.*

IL me semble (Messieurs) que si la folie, comme l'yurongnerie a pour cuuer & recuire ses mauuaises humeurs, ses accèz reglez, & son temps limité, qu'il est bien saison maintenant que chacun de vous recognoisse, comme celuy qui yure & endormy a esté porté à la gueule des loups, l'abyssine & les gouffres dangereux où ceste mousche de Lorraine, qui est la Ligue, vous a aujourd'huy tous precipitez. Considérez, ie vous prie, où vous en estes maintenant venus, iugez de ce dessein par son euenement, de ceste cause par ses effects, & espluchant l'origine & toutes les risseures de ceste pipperie publique, recognoissez vostre esblouissement & vos fautes, & confessez que iamais les compagnons d'Vlysse ne furent par les enchantemens de Circé tant abusez, que vous auez esté par ceste tromperie subtile. Il n'est plus temps de faire les idiots ny les insensibles au iugement de ceste maladie,

elle est grande, elle est mortelle, & qui porte visiblement vos iours à leur dernière ruine. Souvenez-vous donc du temps que ce mal vous vint premièrement assaillir, & par quelles portes il penetra le dedans & les frontieres de cest Estat. C'estoit, disoit-on, pour la manutention de l'Eglise Catholique, Apostolique & Romaine, lors que le Royaume estoit plus paisible, la Religion Catholique plus florissante, & les craintes apostees qui regardoyent la succession de l'Estat plus eslongnees, lors que ceux de la pretendue reformee Religion viuoyent plus retenus & reserrez souz les Edicts du Prince, & tous les Estats du Royaume mieux reglez & ordonnez. Lors nasquit ceste fee de Lorraine. Son commencement fut foible pour la vie & la presence du Duc d'Anjou, qui empeschoit sa croissance, & la faisoit faner. L'on sçait les moyens qui furent tenus pour leuer cest empeschement, l'entreprise de Salcede, son accusation, & ses cōfessions en feirent foy, en fin l'empoisonnement de ce Prince pratiqué dans Paris. Ce grand coup d'Estat fait, ceste Pandore entra incontinent armee parmy nous, elle troubla aussi tost la tranquillité publique, elle changea la serenité de nostre siecle, & ouurant sa boiste

enchantee distribua son poison par tous les Ordres de ce Royaume. L'on veit incontinent fremir les-peuples , murmurer les subiects, se sousleuer les Prouinces, tempester tout le monde, & toutes choses tendre à vne ouuerte rebellion. Et sembla que Dieu eust ordonné ceste furie executrice de ses vengeancees occultes , & le public fleau dont il vouloit chastier l'orgueil & les pechez des François. Ceux de Guyse qui estoient autheurs de ce mal, & qui ne l'auoyent inuenté que pour passer par ce pont routes leurs fortunes au plus hault feste de la Monarchie , & s'emparer de l'Estat, ne cessoyét nuiét & iour de traualier pour luy donner par tout entree, & rendre ses effects plus puissans : si bien que l'on veit de là comme d'un subit esclat de tonnerre toute la France en vn instant embrasée, & les guerres allumees de tous costez. Les causes de ce sousleuement fondees sur les ordinaires bifferies des mal-contents, sur le bien public, & sur le zeile de Religion, mais ceste drogue fut bien tost esuentee par la paix qui suyuit. Car ce soin contre-faict du peuple, fut conuertit en vne simple discussion de leurs interests priuez, & tout ce qui concernoit vostre soulagement, fut mis souz le pied , ainsi ce zeile enragé de

conscience qui brusloit leurs poitrines, fut rafraischi des larmes & des dommages du peuple mesme, & toutes leurs huees du bien public cesserent en ceste gallanterie de Regnard. Voyez depuis quelles furent leurs poursuites, que deuint ceste grande armee mise és mains du Duc de Mayenne pour foudroyer, comme ils se vantoyent, tout le monde habitable : il vous feit bien cognoistre que contre des hommes armez leurs vanteries importunes n'estoyét que bruits de femmes & ieux d'enfans, & qu'ils estoyent plus propres à mener des pratiques parmy vn peuple que non point à combattre des ennemis. Et voyans qu'il n'y auoit rien à gagner pour eux contre le Huguenot, ils quitterent ceste escrime perilleuse, & se remirét à leur premiere chasse parmy le peuple : à cōtrefaire dans les villes les Papelards, porter les grands Chappelets à la ceinture, faire souuér au peuple largesse de pains benits, cōtrefaire les populaires, & se trouuer en apparat à toutes les processions. Si que la nature du peuple, comme liquefíee par ces blandimens, & destrampee dans ces poisons, couloít en leurs passions, qui le rendoit plus prenable par ces artifices, & moins remparé contre ces cautelles. Et pour ne rien oublier à le

disposer d'auantage en leur faueur, ils gagnèrent tous les Prescheurs ordinaires; promettans à ceux qui n'auoyent qu'une Cure vn Euesché, aux simples Chappellains des Cures & des Prieurez, & aux autres des pensions ordinaires. Si bien que corrompus par ces interests, de Sorbonistes, ils se feirent des boutefeux publics, & de Predicateurs des Encomiastes de la maison de Lorraine, & chacune de leurs chaires deuint vne escole de police. Il vous souuiendra (Messieurs) longuement de la iournée des barricades, où vous cogneustes assez clairement les desseins du Duc de Guyse, qui souz le pretexte d'empescher la correction de douze ou quinze mauuais garnimens & entremetteurs de ses pratiques, vous feit tous armer & soulleuer contre vostre Roy: cherchant de vous engager, comme il feit, par quelque extreme meschanceté en son party, & vous obliger par ce crime de felonnie à luy. Où, se seruant de vostre simplicité, il sceut si finement aguiser vos fureurs, qu'il vous feit porter la marotte, & vous feit indignement ouurir la guerre contre vostre pays & contre vostre Prince naturel. Dictes-moy, ie vous prie, avec quel front l'on peut defendre ce qu'il feit lors parmy

vous, où, comme en vne ville d'ennemis
nouuellement conquise, il se saisit de toutes
les forteresses, en deiettant par grande
violence tous les seruiteurs du Roy qui
les tenoyent. Il changea tout le gouuernement
de la ville, & tous les Capitaines: il
composa vne nouvelle garnison dedans,
& arma tous les plus diffames & les plus
meschans, bref il feit tout ce que peut faire
vn nouveau Tyran, qui se veut contre
les Loix asseurer de la possession d'une ville.
Et puis tout cela n'estoit qu'estre bon
Catholique, ce n'estoit point attenter contre
l'Estat, non cela seulement, mais c'estoit,
l'espee trenchante en la main, faire
superbement, avec ostentation, le Roy.
Mais qui peut supporter l'impudence de
ceste denegation, quand l'on considere
qu'il fut encores si naïfement galland de
mander par toutes les villes du Royaume,
qu'elles n'eussent point à y receuoir le
Roy, le voulant quasi interdire de feu &
d'eau, & le contraindre honteusement de
demander la vie pour Dieu? Je ne sçay,
Messieurs, quel exorcisme vous pourroit
retirer de cest enchantement, si toutes ces
choses n'y peuvent rien. Mais adioustez
encores les choses qui passerent iusques à
la mort, voyez ses deportemens violents

aux Estats de Bloys. Car le Roy qui auoit estimé ceste asséeblee necessaire pour pour-
 uoir à tous les desordres de son Royaume, contéter son peuple, & s'asseurer contre les ouuertes pratiques de ce hardi entrepreneur, s'y trouuant en personne, il fut estonné que pensant estre au milieu de ses subiets, il se veit de toutes parts environné d'ennemis, & qui dresloyent des embusches à sa vie & à son Estat, & dont le Duc de Guyse estoit le chef & le directeur, qui publiquemēt & sans plus y mesler d'artifices, faisoit ce qu'il pouuoit pour l'exauthorer, & le reduire à tel poinct qu'il ne luy restast qu'autāt de puissance & pour tel temps qu'il luy plairoit, n'y vsant non plus de dissimulation que celuy qui porte la congnee au pied d'un grād chefsne pour l'abbatre & le porter par terre. Et comme il auoit preparé toutes choses pour se saisir de ce poure Prince, & le mener en triomphe, captif dans Paris, Dieu qui deueloppe les pretextes des iniustices, & qui renuerse souuent sur le seuil de sa porte, celuy qui se preparoit à vn long voyage, arresta tout court ce grand veneur, & luy suscita d'aussi impitoyables amis comme il auoit esté sanglant & implacable en la persecution de tant de pources gens de la

Religion, tellement que ceste conspiration diuinement descouuerte, le Roy le preuint seulement d'un iour, & fut contraint, pour les dangers presens, comme il est accoustumé en tels cas d'Estat, de commencer par l'exécution & par la voye de faict. Combien sont grâds les iugemens de Dieu! celui qui ceste grande iournee de sang & ceste iournee flambante de S. Barthelemy, auoit repeu ses yeux de tant de massacres, & qui en auoit chanté le triomphe, a esté en fin abbattu d'un mesme effort. Ceste mort sembla parmy vo^r auoir ouuert toutes les digues, & rompu tous les ressorts des enfers, & desbordé sur ce miserable Estat tous les feux d'ire & de vengeance. Et cōme maniacles & gens forcenez, vous receustes ceste occasion comme vn flambeau, pour allumer les feux parmy vous. Ce n'est point ici le lieu où ie vueille prodiguer des paroles pour vous môstrer que le Roy l'auoit iustement faict, qu'il ne le pouuoit autrement, & qu'il l'auoit ainsi deu faire : ailleurs cela, & toutesfois vous diray-ie en passant, que le Pape Gregoire dernier, le feit encores bien plus cruement: car luy qui deuoit, pour son degré, conseruer ses mains nettes & immaculees de sang, feit pourtant par sa Bulle, sans for-

me ny ordre de Iustice , assassiner cruellement le Seigneur Parris, grand Vicaire du feu Cardinal d'Armaignac , pour auoir seulement conceu vn soupçon qu'il fauorisoit dans Auignon le party François. Le Duc du Mayne ne fut pas plus moderé enuers le poure Birague, l'vn des plus fideles de son party, lequel sur vn bien debile subiet, il assassina de ses propres mains. Mais encores quand bien en cela le Roy auroit faict quelque chose moins que bien , vous appartenoit-il d'en prendre cognoissance, & comme frenetiques & esprits des Bacchantes , courir aux armes & vous esleuer contre luy? Car il est certain que si toutes les autres Prouinces auoyent , pour ses immoderees liberalitez, quelque probable subiet de se douloir de luy, leurs dommages ont accru vos familles, & vostre ville a esté l'esponge qui s'est grossie des ruines publiques , & sa presence , & la frequence de sa Court chez vous , auoit en dix ans triplé toutes vos richesses. Qui vous sollicitoit donc à vne si infame rebellion? vos interests domestics ne le pouuoient faire des offenses publiques, des iniures priuees. il n'y en auoit point, de pretexte de Religion encores moins, la vengeance du mort ne vous appartenoit, la Loy de Dieu le

vous defendoit, toutes les loix du monde y resistoyent : quelle pouuoit estre donc la cause d'une si grande commotion & de tant de fureurs ? Non, non, croyez que c'est Dieu qui a voulu par vostre propre fer & par vos mains mesmes vous deffaire. Vostre malice avoit monté à son comble, & la pompe & le luxe s'estoyent trop domestiquez chez vous, vous estiez trop attachés aux bauges & au duvet d'Epicure, & dormiez trop oiseusement dans les delices, vostre orgueil & vos richesses vous ont fait oublier Dieu, & il vous a donnez en sens reprouvé. Considérez, ie vous prie, aujourdhuy l'Estat de vostre ville, naguères la plus celebre & la plus opulente de l'Europe, en quelles mains elle est venue, & souz quels gouverneurs. Si des deserts d'Affrique vous eussiez fait venir tous les troupeaux de bestes cruelles pour la repeupler & la rendre deserte, en pouviez-vous plustost avancer la ruine ? Et, si vous cherchez les chiens de ceste chasse, vous trouvez que ce ne sont que ceux qui alloient le passé de porte en porte flairer les euers, bestes de boucherie & de carnage, les ordures, & les plus vils excremens de vostre ville : & dont les uns se sont emparez d'une forteresse, les autres d'une autre,

pour s'asseurer contre la puissance du Magistrat, & brigander plus impunément tout le monde. N'avez-vous point de honte, vous autres bourgeois anciens & bons marchans, qui possédez des biens de iuste acquest, qui composez la partie la plus saine & la plus entiere de la cité, qui ne pouuez conseruer vos familles que par vn ordre & par vne police, de souffrir parmy vous ces poudreux matthois, & ces loups ravisans, & que vous ne conueniez tous pour repurger vostre ville de ces mauuais garnimens, & de vendiquer la seureté publique? car, à dire vray, vostre ville est au-iourd'huy, par la presence de ces hommes, deuenue vne nouvelle Egypte, où toutes sortes de villonneries, de vols publics & de rançonnemens s'exercent. Ne vous prend-il point enuie de vomir, quand vous voyez deuant vos yeux ces harpies publiques, vn Cômmissaire Louchard, vn la Rue, le Clerc, Oliuier, Senault, & leurs compagnons nagueres batteurs de paué & pures belistres, se promener maintenant parmy vous accompagnez d'une grande suite, & enrichis du sac des meilleures maisons? Mais si vne estrange stupeur vous tient, & que vous soyiez insensibles, que les ruines de vos voisins, de vos concitoyens,

& de tant de gens de bien ne vous puissent mouuoir, ouurez pour le moins les yeux sur vous-mesmes, & voyez vostre ruine presente : iugez que peut estre la duree d'un gouuernement si violent, si sanginaire, si confus, & si plein d'extorsions: combien peut demeurer debout vne Republique, où tous les ordres sont peruer-tis, le temple de Iustice pollü, les crimes impunis, l'innocence opprimee, & la violence en regne : où les Magistrats sont sans commandement, le peuple sans obeis-sance, les loix sans autorité, les gens de bien sans suffrages, & où les plus vils & les plus meschans commandent. Mais, quand toutes ces considerations cesseroient, que pensez-vous deuenir ? vous pensez-vous égaux pour soustenir le faix de tant de guerres où vous vous estes iettez, pour vous opposer à vn si grand Roy & le plus grand Capitaine de l'Europe ? à toute la Noblesse, & à tout le corps Aristocratic de la France ? à toutes les forces d'Alemagne, de Dannemarc, de Suede, d'Angleterre, & d'Escoffe ? ne voyez-vous pas que c'est sur vous que toutes ces armes vont fondre, & que vostre ville sera l'eschaffaut où tous les actes de ceste grande Tragedie se joueront ? Quoy donc ? les autres villes qui

sont entrees en Ligue avec vous, vous secoureront: vous vous abusez, pensez que chacune d'elles, en ceste conflagration publique, se trouuera assez empeschee pour se garder & se maintenir, sans estendre des secours à ses voisins. Considerez, ie vous prie, en quelles perplexitez vous vo^r trouuerez impliquez. Vous aurez tousiours à vos portes les armées d'ennemis & d'amis, car tout ce que pourra le Roy mettre de forces ensemble, d'ônera tousiours à vous, comme estant vostre prise la gloire de ses conquestes, & le loyer de ses guerres, contre lesquelles vous ne pourrez vous garantir, si vous ne nourrissez tousiours vne grosse armée dans vos murailles, qui vous deffera autant que celle des ennemis mesmes. Où tourneront en telles extremités vos esperances? vous vous ietterez, dit-on, entre les bras des Espagnols. Quels embrassemens amoureux! Mais croyez qu'ils se ietteront bien mieux encores entre les bras de vos femmes: ils sont Affricains, bazanez, chauds, recuits, subtils, & qui feront bien, sans doute, leurs affaires parmy vous. Que ce sera vn beau meslange d'vn Parisien & d'vn Espagnol, d'vn Pigeon & d'vn Milan, la belle société d'vn Regnard & d'vn Oïson! Pources gens! si vous co-

gnoissiez le naturel de l'Espagnol, vous courriez plustost à la mort qu'à ce refuge. S'il met le pied dans vostre maison, vous y aurez vn maistre insupportable, vn concubinaire neccessaire, vn adulateur violent, vn Tyran impitoyable, & au lieu d'un hôte, vn loup dans vostre famille. Sçachez leurs deportemens aux Indes, en Portugal, en Flandres, en Italie, & en tous les lieux où ils ont estendu leur Empire. Demandez aux Milannois & aux Napolitains combien est douce leur domination. Demandez aux Flamans, lesquels pour la ferocité de leurs mœurs & leur impudique conuersation, ils ne retiennent qu'à force de mords & de grosses garnisons. Considérez l'inegalité de ces deux naturels, le François est liberal, fidele, braue, magnanime, courtois, & amateur de simplicité : l'Espagnol est superbe, auare, cruel, enuieux, soupçonneux, insolent, grand vanteur, grand ostentateur, & par tout incompatible. S'ils se meslent donc vne fois parmy vous, adieu la pudicité de vos femmes, adieu l'honnesteté publique, adieu vostre liberté, & adieu toutes vos lieffes. L'Inquisition sera incontinent parmy vous, & selon que plus ou moins chacun de vous possedera, il sentira mal de la foy, vos belles femmes &

vos belles maisons vous feront tous les iours criminels d'heresie. Vous serez comme bestes de somme & castadours miserables departis dans les villes aux coruees & aux œuures plus viles, vous serez par milliers transportez aux Indes pour y grater les mines, vos portaux & posteaux publics seront reparez de vos testes, & toutes les entrees de vos villes decorees de gibets & de fourches publiques pour vous. Enquerez-vous, ie vous prie, combien de millions d'hommes ils ont cruellemēt esteints dans les Indes, combien en Flandres, combien en Portugal. L'on n'y voyoit es places publiques que quartiers d'hommes detranchez, que corps empallez, que piloris regorgeans de sang & de carnage, & qu'en-seignes publiques de tyrannie : & où les pretextes de cruauté leur manquoient, ils empoisonnoient les hômes pour espouser leurs femmes, & s'emparer de leurs biens & de leurs maisons. Voila dôc, en ce party desesperé, les hommes auxquels vous aurez affaire : mais le Pape, dictes-vous, le vous commande, il vous a donnez à luy, & vostre conscience vous y oblige. Poures gens insensez, c'est bien dommage qu'il ne vous donne au Diable, puis que vous trouvez bon qu'il face de vous comme des caballes

de ses Iuifs, ou des loyers de ses courtisanes. Mais si vous estes marchandise si troquable & de si bonne vente, le saint Pere feroit encores mieux de vous transporter par vaisseaux de charge, sur les hautes de la Moree & d'Egypte, pour vous vendre aux Turcs & aux Mores, il en tireroit encores plus d'argent qu'il ne fera du Roy d'Espagne. Quelle mocquerie du monde! Que diroyent aujourd'huy vn Philippe Auguste, vn Philippe le Bel, vn Loys douzième, Rois tres-excellens & tres-Catholiques, s'ils reuinoyent? qui ont si bien chastié de leur temps les insolences des Papes? Quel malheur, qu'il semble fatal à la Chrestienté que ces bons Lieutenans de Dieu soyent tousiours les flambeaux de l'Europe, & le châp qui produict l'yuraye & la discorde mortelle entre les Chrestiens. Que l'on les ait tousiours veus de siecle en siecle, non comme vne splendeur esclaire sur la poupe de ce vaisseau, mais comme vne grenade, ou vn cercle de feu, embraser toute l'Europe, & mouuoir tousiours des guerres entre les Chrestiens. Ils nous ont depuis cinq cens ans bien fait cognoistre qu'ils auoyent receu les clefs & la succession de saint Pierre, non pour ouurir & dispenser les graces & les benedictions du

Ciel, mais pour crocheter tous les thresors d'Orient & d'Occident, & piller toutes les richesses du monde. Qu'ils auoyent aussi receu la puissance de lier & deslier, non pour absoudre ou obliger les pecheurs, mais pour enchaîner tous les Princes & tous les Rois de la terre, & sur toutes les Puissances terriennes exercer vne tyrannie absoluë. Que si ces excellentes lumieres de la Chrestienté reuiuoyent, vn S. Hierosme, vn S. Augustin, & leurs compagnons, fondateurs de ceste diuine nef, que diroyët-ils auourd'huy de voir au lieu d'vn S. Pierre, professeur de poureté, precepteur d'humilité, exemple de simplicité, & exhortateur d'obedience, vn superbe Crœsus tout reluisant d'or & de richesses, couronné de plusieurs couronnes, tout diapré, tout emperlé, tout argenté, tout phaleré, esleué hautement comme vn Bajazet, ou vn Solyman sur vn throsne superbe, enuironné de gardes, de soldats, de garnisons, & d'vne court magnifique, commandant orgueilleusement au Ciel & à la Terre, donnant & ostant à qui il veut, les Principautez & les Royaumes, & foulant aux pieds toute la rondéur du monde? Que penseroient-ils voir? Penseroyët-ils point au lieu d'estre ici haut, se promener parmy

les Enfers, & au lieu d'un successeur de S. Pierre, voir le Dieu Pluton & le Dieu des richesses enchainé de lingots d'or? Mais quoy? dire cela c'est porter le feu dans la gueuspierre, & s'offrir aux esguillons de ces mousches, l'on criera aussi tost à l'heretique, & desia i'entens tout retétir de huees. Non, non, que la verité les face tant despiter qu'ils voudront, & les face bondir de rage côme vne balle pleine de vent, qu'ils tempestent tant qu'ils voudront, malgré leur violence & toutes leurs fureurs, elle se dira. J'appelle Dieu à tesmoin de mes paroles, & pour vengeur eternal, si ie dis vn pariure, que ie suis & ay tousiours esté de la Religion Catholique, & qui n'ay iamais adheré ny consenti aux instructions ny aux sectes de Calvin, ny de Luther, & toutesfois demeurant dans ce cercle, ie n'y veux estre priué du sens commun, & y perdre la faculté de sauouer les bonnes & mauuaises choses. C'est pourquoy ie dis que S. Pierre n'a iamais rien entrepris sur César, qu'il n'a iamais rié entrepris sur les Puissances temporelles, que Dieu mesme l'a defendu, & que par l'exemple de sa vie il a monstré cela repugner à sa profession, que partât c'est chose que le Pape ne peut selon Dieu faire, & que, s'il le faict, c'est par

violente vsurpation. Mais soyent toutes ces raisons mises souz le pied : voyons encores ce que vous pouuez esperer de l'Espagnol. Ce Roy est vieil, desia radotant, & desia vn pied dans le tombeau, duquel tous les Estats branlent, & ne font qu'attendre que cest horloge sonne pour secouër le ioug : son empire est comme vn buffet marqueté, composé de pieces rapportees, il est composé de conquests iniustes & de choses rauies, il n'est fondé que sur la force, retenu ensemble que par la force, & qui par vne autre force au premier iour se dissipera. Si cela aduiét, comme il fera, que deuiendra vostre secours? vous vous trouuerez, comme l'on diét, vn pied chaussé & l'autre nud, & entre deux fers vne goffre, & vous ne pourrez lors euitier le iuste chastiment de vostre foy violee, & par celuy qui iustemét le pourra. Quoy donc? le Pupil & l'Infante d'Espagne vous couuriront encores de ceste touche : vous auez assez cherement esprouué que vaut le gouuernement de la femme & du mineur, & croyez qu'ils trouuerôt lors assez d'empeschemens chez eux, sans estendre leurs plumes sur les cribleures d'autrui. Mais donnons à toutes vos esperances leur cours, & que ce Roy viue autant

qu'il faut pour conquerir la France, donnons luy desia la conqueste sans cōtredit. Que iugez-vous qu'il fera lors de vous? Pensez-vous pas qu'il ne cognoisse que vostre desespoir, & non vostre amour, vous aura rédus siens? pensez-vous que l'exemple de vostre desloyauté ne luy rende vostre foy suspecte? & que le crime de vostre felonnie ne luy rende tousiours son odeur naturel? Sur quoy pourra-il affermir sa nouvelle conqueste & la duree de vostre subiection, sinon sur la force, sur les fers, sur les manottes, sur des spectacles de gibets, & sur des grosses garnisons? quand il considerera à quelles gens & à quel peuple il aura affaire? ne doutez nullement que cela ne fust, & que vous n'y receussiez des loyers dignes de vos merites. Mais passons plus auant, & que toutes ces cōsiderations soyent encores mises arriere, dōnons que vous soyez assez puissans pour corrompre tous droicts diuins & humains, & pour renuerfer la succession de France: que deviendra lors ceste Monarchie? en combien, ie vous prie, de ruisseaux se departiront les eaux de ce grand fleuve, si son canal naturel est rompu? L'Espagnol y partagera vne Prouince, le Duc du Mayne en retiendra vne autre, le Marquis du Pont,

& le Duc de Sauoye chacun la fiene : combien encores d'autres Seigneurs y loppineront ? combien de petites tyrannies y naistront , combien de petites Republiques s'y formeront , & combien de villes s'y quantonneront ? Et quand ceste face miserable d'Estat aduiédra, pensez ce que vous ferez lors, & ce que vous deuiendrez, vous ferez tousiours en guerres mortelles avec vos voisins, & vne iournee de voyage vous iettera hors des frontieres de vostre pays : & comme l'oiseau confiné dans la cage, ou le poisson tiré des grandes mers dans vn petit ruisseau, vous sentirez vostre liberté oppresse, & desirerez tous les iours n'auoir iamais esté. Mais quand toutes les raisons du monde serôt mortes avec vous, faiçtes du moins que les choses mesmes vous instruisent, ne iugez de la chaleur du feu qu'en le touchant , ny de la clarté du iour qu'en ouurant les yeux, voyez ce que vous auez encores aduancé depuis le commencement de ces troubles, & où vos affaires sont reduictes. Vostre ville est ruinee, vos finances sont espuisees, vos forces rompues, vos partisans consterne, & tous vos moyens particuliers si à l'estroict, que desia la famine vous presse. L'iniustice de vostre cause parle tout haut: Dieu combat

contre vous, sa faueur vous abandonne, sa vengeance vous poursuit, toutes choses vous tournent à rebours, & tous vos succez condamnent vos poursuites. Que dites-vous de la bataille de Senlis, où dix hommes en ont batu cent, & les cent en ont combatu mille? Que dites-vous de tant de rencontres petites & grandes, où vous auez tousiours esté batus? Que iugez-vous de ceste charge d'Arques, où quatre cents cheuaux en ont soustenu quatre mille, que di-ie soustenu, mais attaqué, couru & mené batant iusques dans le gros de leur armee, composee de quarâte mille hommes, avec la perte de leurs meilleurs Capitaines? Qui feit donc cest exploit si glorieux? fut le Roy en personne, tousiours le premier à la charge, & le dernier à la retraicte : & comme les porte-paniers de Madame de Montpensier crioient dans Paris sa perte & sa deffaicte, vous le veistes comme vn subit esclair, aussi tost paroistre à vos portes, & qui vous en apportoit des nouuelles, & en mesme temps le sentistes à vos despens forcer tous vos fauxbourgs, avec vn tel estonnement de vos protecteurs, & vne telle cōsternation publique, que l'on n'y entendoit que pleurs par tout & gemissemens, sans que iamais il parust
dans

dans la ville vn seul soldat des vostres pour la defendre. Et si ce Prince n'eust plus aimé vostre salut, que vous ne faictes vous-mesmes, & qu'il n'en eust craint le sac & le pillage, vous estiez sans doute à luy, & vostre secours y fust trop tard venu. Il me desplaiſt grandement que vous ſoyez tousiours badors, & que les plaisanteries de Madame de Montpensier, & toutes ses petites drogues de femmes, qui à peine tromperoyent deux fois vn enfant, vous entretiennent tousiours en vostre oyſonnerie accoustumee, vos vies & vos fortunes ne sont plus soustenues que de coullis & de restaurans, & des menus artifices de Madame de Montpensier. Elle vous entretient de petits portraicts, & de petits libelles : tantost l'on crie vne deffaiſte, tantost la mort aux rats & aux souris, tantost la mort de quelque Capitaine, & de cela l'on vous faict largesse pour vostre argent. Et pendant que vostre Lieutenant general vous serre estroitement le beguin, qu'il vous met en main la sonnette & le hochet, qu'il vous pare d'une bauerolle, & qu'il faict ses besongnes parmi vous, vous perissez tous miserablement. Mais dictes-moy, ie vous prie, qui a deferé ceste qualité ambitieuse & ma-

gnifique au Duc de Mayenne de Lieutenant general de l'Estat & Couronne de France? Cela, Empereur, Roy, Monarque, sont-ce pas comme nous viuons tous synonymes? sont-ce pas tous tiltres de souveraine dignité? sont-ce trente ou quarante Louchards & Oliuiers, qui ont composé en France ce nouveau Magistrat souverain? Les bouchers de Paris, du temps de Charles sixième, en voulurent faire autant au Duc de Bourgogne, s'ils l'eussent trouué capable de si grande folie. Quelle risée que ceste souveraine dignité, qui, à qui que soit, ne pouuoit par les trois Estats mesmes de France, uiuant le Roy, estre deferee, l'a pourtant esté au Duc de Mayenne, & par vn petit nombre du bas populaire de Paris, avec le mespris extrême de tous lesdicts Estats, & specialement de toute la Noblesse, à laquelle, comme au plus digne membre de la Monarchie, ce faict touchoit d'auantage? Aussi l'on ne voit aucun vray Gentilhomme le recognoistre pour tel, ny marcher souz ses enseignes: & si quelqu'un l'a faict, incontinent mieux aduisé il s'en retire, & à bien l'estimer il n'est rien d'auantage que Preuost des Marchans & Escheuin dans Paris, encores moins solennel-

lement créé que de coustume. Il est le
 Tribun du peuple, & sa guerre & la vo-
 stre est la guerre du peuple, contre les
 Estats Royal & Aristocratic, & toute la
 Noblesse de la France. Car sans doute,
 & tout le monde y void clair, vos vrais
 desseins sont de vous affranchir en Demo-
 cratie, estre regis par Tribuns & Magi-
 strats populaires, vsurper vne puissance
 sur toutes les autres villes de la France,
 exterminer toute la Noblesse, & vous em-
 parer de tous leurs biens. Sont-ce pas les
 ordinaires discours de vos seditieux pres-
 cheurs, que toute la Noblesse est hereti-
 que, qu'elle est ennemie de l'Estat popu-
 laire, qu'elle s'oppose à vos desseins, &
 qu'il la faut exterminer? Ils n'ont en la
 bouche que sang, que meurtres, & que
 massacres, ils ne parlent que de tuer, que
 de meurtrir, que de brusler, & que de
 pendre, & la ferocité de ces maux, sont
 les delices de leurs langues. Mais qui peut
 dire sans tressaillir les extremes desbor-
 demens & les violences de ces loups pu-
 blics, & de ces boutefeux enragez, vn im-
 pudent Inceste, Pigenat, & cinq ou six au-
 tres leurs compagnons les instruments
 maudits de tant de playes publiques qui
 ne se sont contentez d'auoir suscité vn

Moyne desespéré pour meurtrir & assassiner cruellement nostre Roy : mais encores apres cela publiquemēt contre le mort, ils ont vomy de leurs ordes poitrines, & desgorgé routes les plus vilaines & puantes iniures que le plus contumelieux monstre d'Enfer sçauroit inuenter? Quelle plus abominable impieté, qu'ils ont, quand il vnoit, defendu de prier Dieu pour luy, & continuent impudemment aux mesmes defenses apres sa mort? Quelle instruction Chrestienne en la bouche de ces cruels Scythes? Dieu par tout nous recommande la misericorde, nous commande de prier pour nos plus cruels ennemis, & nous defend la vengeance, ce sont ses paroles & les droicts chemins de nostre salut, & ces monstres sanguinaires batent publiquement les tambours, preschent la guerre, preschent la vengeance, & vous defendent de prier Dieu pour vostre Roy viuant & mort. Mais s'ils preschoyent contre Dieu mēme le croiriez-vous? estes vous si priuez du sens commun, & de la cognoissance du bien, que vous ne puissiez cognoistre que ce sont parmy vous esprits malins & Anges de tenebres qui vous seduisent? que ce sont esprits de guerre & de discorde qui vous engagent

en des chemins de perdition ? Mais ils vous ont promis encores vn autre exploit heroïque de Moyne , & de faire bien tost assassiner nostre Roy , ils ont , disent-ils , par voye dix ou douze entrepreneurs desesperez , & dont il ne pourra eiter la main de quelqu'un : ils vous disent à l'oreille , Patience , & que bien tost l'on verra esclorre ce secret. Quels Charlatans , & quels endormeurs de souris ? quelles esperances de meurtriers ? mais Dieu & l'amour de ses bons subiets & seruiteurs le garderont , & par sa prouidence leurs meschans conseils seront dissipéz. Et toutesfois quand vne si detestable entreprise succederoit , penseriez-vous estre mieux ? & que pour vn homme qui s'oppose à vos forfaits , Dieu n'en suscitast cent ? les mesmes interests rallieroyent-ils pas tousiours les mesmes hommes à la poursuite d'un mesme bien , d'un mesme establissement public , & d'une mesme cause ? n'en doutez nullement , & croyez que si vostre chastiment en estoit pour quelque temps differé , que la grauité de la peine recompenseroit bien apres le retardement du supplice. C'est pourquoy (Messieurs) tous ces partis desesperez vous monstrent par tout des precipices , & de tous costez que

vous tourniez, vostre ruine est tousiours à deux pas pres de vous : & toutesfois si vous voulez retourner la teste sur les chemins que vous fuyez, vous y trouuerez aussi tost, avec vostre repos asseuré, tout le bien & le contentement que vous scauriez desirer. Vous aurez affaire à vn Prince vostre Roy naturel, tout plein de bonté & de douceur, qui vous tend les bras, & qui vous receura à si iustes & si équitables conditions, qu'il ne vous pourra rester aucune crainte pour les choses passées de luy, c'est le seul party qui vous peut tous sauuer & vous desgager de tant de sollicitudes & d'ennuis où vous estes auourd'huy plongez. C'est auourd'huy le seul party François, car comme ce Chef est le lien qui rassemble tous les membres de la Monarchie & qui en conserue l'vnion, aussi sans doute, s'il defaut à ce corps, il est impossible que toutes les parties comme les pieces d'un naufrage ne soyent barues de la tempeste, & deiettes en parts toutes contraires : ie scay que ceux qui sont tendres des yeux, les moindres vents les offensent, & que ceux qui ont les esprits disposez à la discorde, les moindres bleffeurs aguissent leur acrimonie, & leur font oublier l'amour de la paix, mais les hom-

mes sages ne laissent iamais tant gagner sur eux les mauuais passions, qu'il ne se trouue tousiours le iour quelque bonne heure, où la raison, comme le liege, ne remonte & ne regaigne le dessus chez eux. Il me semble qu'apres auoir assez longuement cherché vn fonds & ne l'auoir peu trouuer, vous deuez en mer plus calme jeter vostre ancre & changer de Pilote & de nauigation, c'est chose plus aisee à faire que ie ne la puis dire, il ne le faut que vouloir & il sera fait. Je sçay que ceux qui vous voudroyent voir brusler iusques à la derniere flammesche, vous opposent tousiours l'empeschement de la Religion, & par ces craintes tant redictes s'efforcent de vous fermer l'entree de ce port, mais quand vous voudrez fausser ceste barriere enchantee, & vous disposer à voir ce qui est par delà, vous trouuerez le Roy en toute ceste consideration si raisonnable, & qui se dispose à tant de moyens legitimes pour cela & à receuoir instruction, que vous & tous les autres bons Catholiques aurez occasion de vous en bien contenter. Il est Prince de foy, Prince tres-veritable, & tres-homme de bien, qui craint Dieu, & qui iamais ne varia de sa parole, ny ne manqua de foy. Et si vous

reiettez ces moyens de paix & ce seur abry,
& que vous duriez en vostre opiniastreté,
ie voy vostre salut desesperé & vostre per-
dition presente, ineuirable & toute asseu-
ree, & que où la douceur ne vous aura
peu ramener, la force le fera avec vn cha-
stiment si memorable, que vous seruirez
d'exemple à toute la posterité.

F I N.

